


प्रसार भारती
प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन

18.10 बुधवार

दिनांक 27.05.2026



प्रमुख समाचार –

- 1– केन्द्रीय मंत्रिमंडल ह सार्वजनिक वितरण प्रणाली के तहत रासन, परिवहन अउ प्रबंधन सहायता योजना, सार्थक-पीडीएस ल जारी राखे के दीन मंजूरी।
- 2– प्रधानमंत्री नरेन्द्र मोदी ह देस के आने-आने हिस्सा म बाढ़त तापमान ल देखत लोगन मन ल सावधानी बरते के दीन सलाह।

अउ

- 3– प्रदेश के आने-आने जिला म खाली पड़े सरकारी जमीन मनके विकास बर राज्य सरकार ह रिडेवलपमेंट कार्ययोजना तैयार करही।

केन्द्रीय मंत्रिमंडल-पीडीएस

केन्द्रीय मंत्रिमंडल ह आज सार्वजनिक वितरण प्रणाली के तहत रासन, परिवहन अउ प्रबंधन सहायता योजना, सार्थक-पीडीएस ल जारी राखे के मंजूरी दे देहे। एखर बर केन्द्र सरकार कोति ले पच्चीस हजार पांच सौ तीस करोड़ रुपिया के आवंटन करे गेहे। नई दिल्ली म मीडिया मन ल जानकारी देवत सूचना अउ प्रसारण

मंत्री अश्विनी वैष्णव ह किहीन कि ए योजना राज्य एजेंसी मन ल अंतर्राज्यीय खाद्यान्न परिवहन के संगेसंग सार्वजनिक वितरण प्रणाली के आधुनिकीकरण म मदद करही।

प्रधानमंत्री-लू

प्रधानमंत्री नरेन्द्र मोदी ह देस के आने-आने हिस्सा म बाढ़त तापमान ल देखत लोगन मन ल सावधानी बरते के सलाह देहे। सोशल मीडिया पोस्ट म श्री मोदी ह लोगन मन ले कहिन हे कि ओमन भरपूर पानी पीये अउ घर ले बाहिर निकलत बेरा अपन संग पानी जरूर राखय। ओमन सुझाव दीन कि जउन भी प्यासा हे, ओला एक गिलास पानी जरूर पिलावयं। प्रधानमंत्री ह जम्मों झिन ले कहिन कि ओमन अपन परिवार वाले मन संग संपर्क म राहय अउ उंखर हाल-चाल पूछत राहय। मंझनिया के चमचमावत घाम म बाहिर निकले ले बाचयं अउ जतका हो सके आराम करयं। ओमन जम्मों झिन ले आग्रह करीन कि जानवर अउ पक्षी मन बर घर, बालकनी, छत, दुकान या आफिस के बाहिर एक टिन छोटे बर्तन म पानी भरके जरूर राखय। प्रधानमंत्री ह लोगन मन ले ए मुश्किल के दिन म पूरा संवेदनशीलता अउ करुणा के संग एक-दूसर के ख्याल राखे बर केहे हे।

ऐति, मुख्यमंत्री विष्णुदेव साय ह घलो जोरदरहा गर्मी ल देखत प्रदेशवासी मन ले अपन ध्यान राखे के अपील करे हे। मुख्यमंत्री ह कहिन हे कि जादा गर्मी के दउर म हरेक मनखे ल अपन स्वास्थ्य के संगेसंग अपन तीर-तखार के लोगन मनके घलो बिसेस ध्यान रखना चाही।

सुप्रीम कोर्ट-एसआईआर

सर्वोच्च न्यायालय ह निर्वाचन आयोग डहार ले कराय गे मतदाता सूची के विशेष गहन पुनरीक्षण-एसआईआर प्रक्रिया के वैधता ल बरकरार राखे हे। मुख्य न्यायाधीश सूर्यकांत अउ न्यायमूर्ति जॉय माल्या बागची के पीठ ह आज ए मामला के सुनवाई करत कहिन कि एसआईआर प्रक्रिया स्वतंत्र अउ निष्पक्ष चुनाव के संवैधानिक जरूरत ल आगू बढ़ाथे। न्यायालय ह ए तर्क ल घलो खारिज कर दीन कि ए प्रक्रिया ले मतदाता सूची म पहिलीच ले मौजूद मनखे मनके नागरिकता के अनुमानित मान्यता खत्म हो जथे।

रिडेवलमेंट कार्ययोजना

प्रदेस के आने-आने जिला म खाली पड़े सरकारी जमीन मनके विकास बर राज्य सरकार ह रिडेवलमेंट कार्ययोजना तैयार करही। एखर तहत सरकारी विभाग, निगम मंडल अउ बोर्ड के खाली जमीन मनके उपयोग करके डिजिटल लैंड बैंक बनाय जाही।

मुख्य सचिव विकासशील के अगुवाई म आज मंत्रालय म होय समीक्षा बइठका म फइसला ले गीस कि जम्मा सरकारी जमीन के जीआईएस मैपिंग करके ऑनलाइन रिकॉर्ड तैयार करे जाही। उहें, सहर मन म खाली जमीन म आवासीय योजना, व्यावसायिक कॉम्प्लेक्स अउ सरकारी कार्यालय बनाय जाही। उहें, ग्रामीण क्षेत्र म कृषि, वेयरहाउस अउ कौशल विकास केन्द्र स्थापित करे जाही। योजना के तहत जर्जर भवन मन ल हटाके नवा निर्माण कराय जाही अउ जमीन मन ल अतिक्रमण ले बचाय बर फेंसिंग अउ सामलात निगरानी के व्यवस्था करे जाही।

मंत्रिपरिषद बैठक

मुख्यमंत्री विष्णुदेव साय के अगुवाई म काली संज्ञा मंत्रालय म होय राज्य मंत्रिपरिषद के बइठका म कतकोन महत्वपूर्ण फइसला ले गीस। बइठका म राज्य के आने-आने विभाग अउ निकाय मन म जमा स्क्रेप सामग्री के पारदर्शी निस्तारण बर एमएसटीसी के संग सेलिंग एजेंसी अनुबंध के बेरा ल अवइया तीन बछर तक बढ़ाय के फइसला करे गीस। उहें, छत्तीसगढ़ कर्मचारी चयन मंडल ल सामान्य प्रशासन विभाग के अधीन लाय के प्रस्ताव ल घलो 0मंजूरी दे गीस। एखर संगेसंग बिटुमिन यानी डामर के कीमत म बढ़ोतरी ल देखत सड़क निर्माण काम प्रभावित इन होवय, एखर बर एक अप्रैल ले तीस जून तक ठेकेदार मन ल थोरबहुत कीमत म राहत देके फइसला ले गीस।

अरुण पांडेय—नियुक्ति

राज्य सरकार ह भारतीय प्रशासनिक सेवा के अधिकारी अरुण कुमार पांडेय ल प्रधान मुख्य वन संरक्षक नियुक्त करे हे। श्री पांडेय ह रिटायर आईएफएस अधिकारी व्ही. श्रीनिवास राव के जगह लीही। ए संबंध म वन अउ जलवायु परिवर्तन विभाग डहार ले आदेस जारी कर दे गेहे।

केन्द्रीय मंत्री—मुख्यमंत्री

केन्द्रीय कोयला अउ खान राज्यमंत्री सतीश चन्द्र दुबे ह काली रायपुर म मुख्यमंत्री विष्णुदेव साय ले भेंट करीन। बड़ठका म छत्तीसगढ़ म कोयला उत्पादन बढ़ाय, ऊर्जा सुरक्षा, खनन क्षेत्र म आधारभूत संरचना अउ रेल—लॉजिस्टिक्स कनेक्विटी के विस्तार म गोठबात होइस। दूनो नेता मन ह स्वच्छ ऊर्जा, कोयला गैस अउ सौर ऊर्जा विकास के माध्यम ले निवेस अउ रोजगार के नवा मउका बढ़ाय उपर जोर दीन।

मुख्य सचिव—सहकारी समिति

मुख्य सचिव विकासशील ह सहकारी समिति मन ल मजबूत बनाके किसान मन ल आत्मनिर्भर बनाय उपर जोर दीन हे। रायपुर म राखे गे राज्य सहकारी विकास समिति के बड़ठका म ओमन हर ग्राम पंचायत म सहकारी समिति संचालित करे के निरदेस दीन। बड़ठका म प्राथमिक कृषि साख समिति यानी पैक्स ल दुग्ध, मत्स्य पालन अउ लघु वनोपज गतिविधि ले जोड़े उपर गोठबात होइस। ग्रामीण क्षेत्र म बैंकिंग सुविधा बढ़ाय बर माइक्रो एटीएम अउ रूपे कार्ड उपलब्ध कराय के समीक्षा घलो करे गीस। मुख्य सचिव ह सहकारी शक्कर कारखाना म इथेनॉल संयंत्र के निर्माण म तेजी लाय के निरदेस दीन।

सराफा व्यापारी—हत्या

गौरेला—पेंड्रा—मरवाही जिला म पाछु रतिहा अज्ञात लोगन मन ह एक सराफा व्यापारी के गोली मारके हत्या कर दीन। ए घटना पेण्ड्रा के कोटमी मुख्य बाजार के बताय जावत हे। मिले खबर के मुताबिक बदमास मन ह भीड़ वाले इलाका म व्यापारी उपर गोली चलईन अउ मउका ले फरार होगे। घायल व्यापारी ल अस्पताल ले

जाय गीस, जिहां डॉक्टर मन ह ओला मृत घोषित कर दीन। पुलिस ह नाकाबंदी करके आरोपी मनके तलास सुरु कर देहे।

ए घटना के विरोध म आज गौरेला-पेंड़ा-मरवाही जिला म बंद के ऐलान करे गीस, जेला सबो प्रमुख संगठन मन ह अपन समर्थन दीन। घटना के बाद ले कोटमी मुख्य बाजार म सुरक्षा बल मन ल तैनात करे गेहे।

आवासीय खेल अकादमी

बस्तर म आवासीय खेल अकादमी म प्रवेश बर चयन परीक्षा कली अउ परन दिन यानी अट्ठाईस अउ उनतीस मई के जगदलपुर स्थित धरमपुरा क्रीडा परिसर म बिहनिया सात बजे ले रखे जाही। ट्रायल म सुधर प्रदर्शन के आधार म खिलाड़ी मनके चुनई करे जाही। आवासीय खेल अकादमी म एथलेटिक्स, तीरंदाजी अउ फुटबॉल जइसन खेल मन ल सामिल करे गेहे। अकादमी म तेरह ले सत्रह बछर आयु वर्ग के लइका मन प्रवेश ले सकत हे।

महंगाई भत्ता-बढ़ोतरी

छत्तीसगढ़ सरकार ह अखिल भारतीय सेवा के अधिकारी मनके महंगाई भत्ता म दू प्रतिशत के बढ़ोतरी के आदेस जारी करे हे। सामान्य प्रशासन विभाग उहार ले जारी आदेस के मुताबिक अब आईएएस, आईपीएस अउ आईएफएस अधिकारी मन ल अंठावन प्रतिशत के जगह साठ प्रतिशत महंगाई भत्ता मिलही। बाढ़े महंगाई भत्ता एक जनवरी दू हजार छब्बीस ले प्रभावी माने जाही।

तेंदूपत्ता संग्रहण

राज्य के नौ सौ ले जादा लघु वनोपज सहकारी समिति के माध्यम ले ए दिन तेंदूपत्ता इकट्ठा के काम करे जावत हे। प्रदेश म अब तक तेरह लाख बावन हजार ले जादा मानक बोरा तेंदूपत्ता के इकट्ठा कर ले गेहे। तेंदूपत्ता संग्रहण म बिलासपुर वृत्त सबले आगू हवय, जिहां तीन लाख ले जादा मानक बोरा तेन्दूपत्ता इकट्ठा करे गेहे। एखर बाद सरगुजा, कांकेर अउ रायपुर वृत्त के जघा हवय। राज्य सरकार उहार ले तेंदूपत्ता संग्रहण

के दर साढ़े पांच हजार रूपिया प्रति मानक बोरा निर्धारित करे गेहे अउ संग्राहक मनके खाता म सीधा भुगतान करे जावत हे।

संक्षिप्त समाचार

– भारतीय राष्ट्रीय राजमार्ग प्राधिकरण–एनएचएआई ह बिलासपुर ले रायगढ़ के बीच राष्ट्रीय राजमार्ग क्रमांक–उनचास म यात्री मन ल तुरते मदद दे बर डायल नंबर – एक शून्य तीन तीन आधुनिक आपातकालीन चिकित्सा एंबुलेस सेवा के सुरुआत करे हे।

– छत्तीसगढ़ रियल एस्टेट विनियामक प्राधिकरण–रेरा ह बतईन हे कि कुछेक अनाधिकृत मनखे मन ह खुद ल रेरा के अधिकारी या कर्मचारी बताके लोगन मन ले पइसा के मांग करत हे। प्राधिकरण ह आम लोगन मन ल अइसन साइबर ठग मन ले सतर्क रहे के सलाह देहे।

– मुख्यमंत्री अनुसूचित जाति अउ जनजाति विद्यार्थी उत्कर्ष योजना के तहत कक्षा छठवीं म प्रवेश बर प्रस्तावित प्रक्रिया ल कोनों कारण ले स्थगित कर दे गेहे।

अउ

– प्रदेश म ए दिन पड़त जादा गर्मी ल देखत नवा रईपुर के नंदनवन जंगल सफारी ल पर्यटक मन बर अट्ठाईस अउ उनतीस मई के बंद राखे गेहे। अपर प्रधान मुख्य वन संरक्षक ह बतईन कि ए फइसला वन्य प्राणी मनके स्वास्थ्य मन ल ध्यान म राखत ले गेहे।

